

**UCAPAN PERDANA MENTERI DI UPACARA
PENUTUP DAN PENYAMPAIAN HADIAH PER-
TANDINGAN MEMBACA AL-QURAN PERING-
KAT ANTARABANGSA DI STADIUM MERDEKA,
KUALA LUMPUR PADA 29HB OKTOBER, 1972**

Duli Yang Maha Mulia Seri Paduka Baginda Yang Dipertuan Agung¹ dan Duli Yang Maha Mulia Seri Paduka Baginda Raja Permaisuri Agung.

Ampun Tuanku beribu-ribu ampun.

Patik menjunjung kasih yang amat sangat terhadap ke bawah Duli Tuanku berdua kerana sudi berangkat mencemarkan duli ke majlis penyampaian hadiah-hadiah kepada pemenang-pemenang Pertandingan Membaca Al-Quranul-Karim peringkat Kebangsaan dan Antara-bangsa pada malam ini.

Sesungguhnya patik-patik pacal yang berada di sini merasa sangat bertuah dan gembira kerana Duli Tuanku telah pun berkenan merasmikan Pertandingan pada peringkat antara-bangsa tiga malam yang lalu.

Berkat daulat Duli Tuanku, Pertandingan Membaca Al-Quranul-Karim tahun ini adalah lebih meriah daripada masa-masa yang lalu dengan adanya sokongan dan sambutan yang hangat dari negara-negara sahabat. Adalah nyata daripada hakikat ini bahawa Kerajaan Duli Tuanku mempunyai tempat dan mertabat yang semakin tinggi di kalangan negara-negara Islam khususnya dan dunia internasional amnya.

Ampun Tuanku beribu-ribu ampun, patik memohon izin meneruskan ucapan kepada hadirin di Majlis ini.

Assalamualaikum warahmatullahi wabarakatuh.

Y.B. Menteri-menteri, Y.B. Tuan Pengerusi, Y.A.B. Menteri-menteri Besar, Dif-dif yang terhormat, Saudara-saudara sekalian,

¹ D.Y.M.M. Tuanku Abdul Halim Muadzam Shah.

Syukur Alhamdulillah, dengan berlangsungnya Majlis malam ini sampailah kita pada upacara terakhir dalam Pertandingan Membaca Al-Quran hijrah 1392 ini.

Selama lima hari berturut-turut Stadium Merdeka ini telah menjadi tumpuan rakyat Malaysia yang beragama Islam dan juga yang bukan Islam, dari jauh dan dekat. Selain dari mereka yang datang membanjir Ibu Negara, ratusan ribu pula bahkan jutaan bilangan rakyat yang memusatkan perhatian dan pandangan mereka ke Stadium ini melalui TV dan Radio masing-masing kerana tidak mahu ketinggalan menyambut dan mengingati peristiwa Nuzul Al-Quran.

Sebagaimana dapat diperhatikan, susunan Majlis Pembukaan Pertandingan telah pun disulami dengan acara yang menarik termasuk pantomin kemegahan Islam sebagai agama yang progresif serta menggalakkan perkembangan sains dan teknologi. Ini jelas membuktikan bahawa agama kita tidaklah mengkongkong kemajuan bahkan sebaliknya menghendaki umat Islam berusaha melengkapi diri dengan ilmu pengetahuan untuk kebahagiaan hidup.

Semasa pembukaan Pertandingan peringkat Kebangsaan dulu, saya telah juga menyebut tentang pelancaran Tabung Ekonomi Islam sebagai satu usaha mengumpulkan modal Bumiputera dan dengan itu dapat memperkukuh kedudukan kewangan kita untuk pelaburan di bidang perniagaan dan perusahaan. Dalam hal ini, saya berharap setiap Kerajaan Negeri akan bertindak dengan cergas supaya matlamat Tabung ini dapat dicapai sepenuhnya.

Pada kesempatan ini, suka saya merakamkan ucapan setinggi-tinggi tahniah kepada Qari-qari dan Qariah-qariah yang telah berjaya di dalam pertandingan ini. Kepada peserta-peserta yang tidak bernasib baik saya harap mereka akan bersungguh berlatih dan berusaha muda-mudahan mereka akan berjaya pada masa akan datang. Begitu juga suka mengucapkan terimakasih kerajaan kepada Ahli-ahli Jawatankuasa Pertandingan atas usaha mereka yang tidak mengenal penat lelah selama beberapa bulan ini, kepada Kerajaan negara-negara sahabat yang menghulurkan tangan ikhlas membantu bagi menjayakan Pertandingan sama ada dengan menghantar para Hakim, para peserta dan pemerhati, serta tidak ketinggalan juga kepada Kerajaan-kerajaan Negeri dan semua pihak yang berkenaan atas sumbangan mereka.

Begitu juga terima kasih saya kepada orangramai dari kaum Muslimin dan lain-lain yang memberikan sambutan meriah selama Pertandingan ini berlangsung tanpa mengira hujan dan sebagainya. Segala ini memberikan inspirasi dan dorongan yang kuat kepada saya dan rakan-rakan saya buat masa akan datang.

Saya sukalah juga mengumumkan di sini keputusan yang diambil oleh Kerajaan untuk memberikan galakan dan dorongan kepada peserta-peserta Pertandingan Membaca Al-Quran ini. Adalah dicadangkan bahawa Johan Qari dan Qariah akan diberi hadiah istimewa iaitu menunaikan Fardhu Haji di Makkatul Mukarramah atas perbelanjaan Kerajaan. Andaikata mereka sudah pun mengerjakan Haji, mereka boleh pula membuat lawatan ke negara-negara Islam di Asia Barat dan Afrika supaya mereka dapat meluaskan pandangan dan mempeljari perkembangan serta kemajuan negara-negara Islam itu.

Akhirnya saya berdoa kehadiran Tuhan mudah-mudahan segala-gala usaha-usaha kita bagi meninggikan syiar Islam akan diberkati Allah Subhanahu Wataalla kepada Para Hadirin, peserta-peserta dan pemerhati dari Negara sahabat-sahabat pulang ke Negara masing-masing. Mudah-mudahan kita dapat berjumpa lagi pada tahun hadapan.

Ampun Tuanku beribu-ribu ampun,

Patik menjunjung kasih mempersilakan Tuanku menyampaikan hadiah-hadiah kepada pacal-pacal pemenang dalam Pertandingan Membaca Al-Quranul-Karim tahun 1972.